

艸

蘭

草

金





雙溪詩餘


宋

朱

炎

自敘

古詩自風雅以降漢魏閒乃有樂府而曲居其一今之  
長短句蓋樂府曲之苗裔也古律詩至晚唐衰矣而長  
短句尤為清脆如么絃孤韻使人屬耳不厭也予於詩  
文本不能工而長短句不工尤甚蓋長短句宜歌而不  
宜誦非朱脣皓齒無以發其要妙之聲予為舉子時早  
夜治程文以幸中於有司古律詩且未暇著意況長短  
句乎三十有二始得一第未及升斗之粟而慈親下世



以故家貧清苦終身家無絲竹室無姬侍長短句之腔  
調素所不解終喪得簿崇陽逮今又五十年而長短句  
所存者不過五十餘闕其不工可知今之爲長短句者  
字字信閨閫事故語懦而意卑或者欲爲豪壯語以矯  
之夫古律詩且不以豪壯語爲貴長短句命名曰曲取  
其曲盡人情惟婉轉嫵媚爲善豪壯語何貴焉不溺於  
情慾不蕩而無法可以言曲矣此炎所未能也曹公論  
雞跖曰食之無益棄之可惜此長短句五十餘闕亦雞  
跖之類也故哀而集之因發其意於首云

蝶戀花

崇陽縣夜飲

纖手行杯紅玉潤滿眼花枝雨過  
胭脂嫩新月一眉生  
淺暈酒闌無奈添春困  
喚起醉魂君不問  
憔悴顏容  
羞與花相近人自無情  
花有韻風光易老何須恨

又

柳暗西湖春欲暮  
無數青絲不繫行人住  
一點心情千  
萬緒落花寂寂風吹雨  
喚起聲中人獨睡  
千里明駝  
不踏山間路  
謾道遣愁除是醉  
醉還易醒愁難去

點絳脣

崇陽野次



雨溼東風誰家燕子穿庭戶孤村薄暮花落春歸去  
浪走天涯歸思縈心緒家何處亂山無數不記來時路  
水調歌頭

夜泛湘江

江月恰如水江水碧於空晚來一霎過雨爲我洗秋容  
悄悄四山人靜凜凜三更露下天闊叫孤鴻喚醒蓬窗  
夢身在水晶宮 揖湘妃招月姊御清風素琴韻遠不  
覺醉眼杏花紅禹穴騎鯨仙去東海釣鰲人遠此意與  
誰同倚柁一長嘯出壑舞魚龍

登石鼓合江亭

千里倦遊客老眼厭塵煙蒸湘平遠他處無此好江山  
把酒一聽欵乃過了黃花時節水國倍生寒輸與滄浪  
叟長伴白鷗閑 傍江亭窮杳靄踞巉巖水深石冷聞  
道別有洞中天待倩靈妃調曲喚起馮姨短舞從此問  
羣仙雲海渺無際波湧緩移舡

念奴嬌

菊

小妝朱檻護秋英千點金鈿如簇黃葉白蘋朝露冷只  
有孤芳幽馥華髮蒼頭宦情羈思來伴花幽獨巡簷無  
語清愁何啻千斛 因念愛酒淵明東籬雅意千載無

雙溪詩集  
三  
人續身在花邊須一醉小覆盃中醞醖過了重陽捻枝  
嗅藥休歎年華速明年春到陳根更有新綠

鷓鴣天

梅

淡淡疏疏不惹塵暗香一點靜中間人閒怪有晴時雪  
天上偷回臘裏春 疑淺笑又輕顰雖然無語意相親  
老來尙可花邊飲惆悵相攜失玉人

阮郎歸

落花時節近清明南園芳草青東風料峭雨難晴那堪  
中宿醒 回頭處自銷凝誰知人瘦生倚闌無語不禁

情杜鵑啼數聲

青玉案

深紅數點吹花絮  
又燕子飛來語遠  
水平蕪春欲暮  
年長是清明時候  
故遣人憔悴  
竹雞啼罷山村雨  
正  
寥落無情緒  
猛省從前多少事  
綠楊堤上樓臺如畫  
此  
景今何處

浪淘沙令

開禧丙寅在大坂作

流水遶孤村  
楊柳當門  
昔年此地往來頻  
認得綠楊攜  
手處  
笑語如存  
往事不堪論  
強對清尊  
梅花香裏月

黃昏白首重來誰是伴獨自銷魂

木蘭花慢

細桃花樹下記羅襪昔經行至今日重來人惟獨自花  
亦凋零青身杳無信息遍人間何處覓雲輶紅錦織殘  
舊字玉簫吹斷餘聲銷凝衣故幾時更又誰復唧唧  
念鏡裏琴中離鸞有恨別鵲無情齊眉處同笑語但有  
時夢見似平生愁對嬋娟三五素光暫缺還盈

清平樂

越上作

呢喃燕語共訴春歸去春去從他留不住落盡枝頭紅

雨 老翁袖手優游閑愁不到眉頭過了麥黃椹紫歸  
期只在新秋

又

兒曹耳語借問何處去家在翠微深處住生計一犁春  
雨 客中且恁浮游莫將事挂心頭縱使人生滿百算  
來更幾春秋

浪淘沙

辛未中秋與文尉造可飲

月色十分圓風露娟娟木犀香裏凭闌干河漢橫斜天  
似水玉鑑光寒 草草具盃盤相對蒼顏素娥莫惜少

留連秋氣平分蟾兔滿動是經年

卜算子

嘉定癸酉二月雨後到雙溪

渡口喚扁舟雨後青綃皺輕暖相重護病軀料峭還寒  
透老大自傷春非爲花枝瘦那得心情似少年雙燕  
歸時候

又

散策問芳菲春半花猶未蓓蕾枝頭怯苦寒恰似人憔悴  
人莫恨花遲天自催寒去雨意纔收日氣濃玉靨  
紅如醉

江城子

癸酉春社

清波渺渺日暉暉  
柳依依草離離  
老大逢春情緒有誰  
知簾箔四垂  
庭院靜人獨處  
燕雙飛  
怯寒未敢試春  
衣  
踏青時  
嬾追隨  
野簌山穀  
村釀可從宜  
不向花邊拚  
一醉  
花不語  
笑人痴

虞美人

甲戌正月望後燕來

鏡中失畫雙青鬢  
嬾更占花信  
小梅半謝雨垂垂  
未許輕紅破  
蕾綴桃枝  
社前歸燕穿簾語  
似說人憔悴  
自

緣老去少懽悰不是春寒料峭怯東風

南鄉子

甲戌正月

雲淡日曛明久雨潺潺乍得晴社近東皋農務急催耕  
又見菖蒲出水清池面縠紋平掠水迎風燕羽輕試  
出訪尋春色看相迎巧笑花枝似有情

憶秦娥

甲戌賞春

胭脂點海棠落盡青春晚青春晚少年遊樂而今慵嬾  
春光不可無人管花邊酌酒隨深淺隨深淺牡丹紅

透茶蘼香遠

臨江仙

吳宰生日

欲近上元人意好月如人意團圓暖風催趣養花天三  
山來鶴駕萬戶識冕仙 手種河陽桃李樹暫時來看  
春妍綵衣一笑棹觥舫明年當此日人到鳳池邊

好事近

同前

時節近元宵天意人情都好煙柳露桃枝上覺今年春  
早 遏雲一曲鳳將雛疑是在蓬島玉筍扶盃漱澣願

雙溪詩會  
七  
黑頭難老

水調歌頭

留宰生日

愛日護輕暖醞造小春時桃溪雲斂一點郎星吐青輝  
鍊玉顏容難老點漆精神如舊不用摘霜鬢厭薄蓬萊  
景戲踏兩鳧飛 潘花底陶柳外細民肥萬家喜色融  
瑞氣擁牙紉憑仗春葱洗玉領略朱櫻度曲引滿又何  
辭只待琴歌畢安步上丹墀

念奴嬌

海棠時過江潭

曉來雨過正海棠枝上  
麝脂如滴桃杏不堪來  
比似信是傾城傾國  
藏韻收香誰能描貌  
閣盡詩人筆從教睡  
去爲留銀燭終夕  
不待過了清明綠陰  
結子無處尋春色  
簌簌輕紅飛一片便覺  
臨風悽惻莫道無情  
嫣然一笑也似曾相  
識惜花無主自憐身  
是行客

浪淘沙令

菊

秋色滿東籬露滴風  
吹憑誰折取  
泛芳卮長是年年重  
九日苦恨開遲  
因記得當時共撚  
纖枝而今寂寞  
鳳孤飛不似舊來  
心緒好惟有花知

採桑子

秋日丁香

一番飛次春風巧細看工夫點綴紅酥此際多應別處  
無一玉人未與花爲主辜負芳菲香透簾幃誰向釵頭  
插一枝

好事近

早梅

玉頰映紅綃纔報東風消息雖則清臞如許有生香真  
色相看動是隔年期忍不飲涓滴莫待輕飛一片卻  
說花堪惜

臨江仙

落梅

雪片幻成肌骨月華借與精神一聲羌笛怨黃昏吹香  
飄縞袂脫迹委紅裙 枝上青青結子子中白白藏仁  
那■時別是一家春劈泥嘗煮酒拂席臥青雲

卜算子

膩玉染深紅豔麗難常好已是人間被禊時花亦隨春  
老 喚起麴生來醉賞惟宜早此去陰晴十日閒點點  
粘芳草

木蘭花慢

暮春時在分寧

博山香霧冷新雨過怯單衣正飛絮濛濛平蕪杳杳家  
在天涯春難住人易老又等閑過了踏青時枝上紅稀  
綠暗杜鵑剛向人啼 依依謾歎歌生彈鋏塵滿弦微  
想北山猿鶴南溪鷗鷺怪我歸遲青雲事今已晚倚小  
窗誰與話襟期對酒有愁可解劈牋無怨休題

小重山

至後一日長興趙宰到郡并招歸安身程二宰及項  
廣文同飯

日腳才添一線長葭灰吹玉管轉新陽老來添得鬢邊

霜年華換歸思滿滄浪  
喚客對凝香公庭鳧鷖散緩  
行觴何須紅袖立成行  
清淡好勝似聽絲簧

阮郎歸

雪川作

幾回幽夢遶家山  
怯聞梅弄殘  
瀟瀟黃落客氈寒  
不禁衣帶寬  
身外事意闌珊  
人閒行路難  
尋思百計不如  
閑休貪朱兩轡

臨江仙

莫子章郎中買妾佐酒魏倅以詞戲之次韻

試問休官林下去  
何人得似高年  
壺中不記歲時遷  
吹

簫新有伴淦玉共求仙  
有客尊前曾得見  
月眉雲鬢娟娟  
斷腸刺史獨無眠  
誰能聞一曲  
偷向笛中傳

又

思憶故園花又發  
等閒過了流年  
休論陞擢與平遷  
拂衣歸去好無事  
卽神仙  
況是老人頭雪白  
羞看紅粉嬋娟  
鸞孤鳳隻且隨緣  
莫將桃葉曲留與世人傳

水調歌頭

送魏倅

新漲鴨頭綠  
春滿白蘋洲  
小停畫鷁  
莫便折柳話離愁  
縹緲觚稜在望  
不用東風借便  
一瞬到皇州  
別酒十分

酌何惜覆瑤舟 從此去上華頂入清流人門如許自  
合墜手復公侯老我而今衰謝夢繞故園松菊底事更  
遲留早晚挂冠去江上狎浮鷗

南柯子

天末家何許津頭客未歸柳梢綠暗早鶯啼蝴蝶不知  
春去遶園飛 選勝多遊冶當壚有麗姝青翰載酒泛  
晴暉不忍十分寥落負花時

好事近

閒日似年長又在他鄉春暮柳外一聲鶉鳩怨落花飛  
絮 苧羅只似舊時村佳人在何處試問嗚夷因甚載

輕舟同去

朝中措

杜鵑聲斷日曛曛  
過雨溼殘紅  
老色菱花影裏  
客愁蕉葉香中  
柳梢飛絮  
桃梢結子  
斷送春風  
莫恨春無覓處  
明年還在芳叢

南柯子

秀叔娶婦不令人知  
以小詞爲賀  
因戲之

對鏡鸞休舞  
求鳳凰自飛  
珠鈿翠珥  
密封題中有鸞牋  
細字沒人知  
環佩燈前結  
輜駟月下歸  
笑他織女夜  
鳴機空與牛郎相望  
不相隨

朝中措

九月末水仙開

薔薇露染玉肌膚欲試縷金衣一種出塵態度偏宜月  
伴風隨 初疑邂逅湘妃洛女似是還非只恐乘雲輕  
舉翩然飛度瑤池

西江月

用茶蘼釀酒飲盡因成此謾呈繼韓

款款落紅都盡依然見此清姝水沈爲骨玉爲膚留得  
春光少住 鴛帳巧藏翠幔燕釵斜鞞纖枝休將往事  
更尋思且爲濃香一醉

柳梢青

鄭宰母生日

葭管風微萊衣香軟歌鳳將雛笑酌流霞問人何處別  
有瑤池 相將月佩霞裾領鳧鳥歸朝玉墀管取長年  
進封六國穩住清都

踏莎行

木落天寒年華又暮老來多病須調護詩編酒榼總無  
緣閒中贏得曹騰睡 塵暗犀梳香消翠被悄無音信  
來青羽新愁正上自眉峯黃昏庭院瀟瀟雨

清平樂

嘉定壬申除夜

一盃椒醕惜飲難成醉  
爆竹聲中人未睡  
共道今宵守歲  
不如且就衾裯  
誰能細數更籌  
三百六旬過了  
明朝卻是年頭

南柯子

山冥雲陰重  
天寒雨意濃  
數枝幽口溼啼紅  
莫爲惜花惆悵對東風  
簑笠朝朝出  
溝塍處處通  
人間辛苦是三農  
要得一犁水足望年豐

夜行舡

賀將使叔成寶相寮

雙溪詩集  
三  
淡飯粗衣隨分過新成就庵寮一箇靜處藏身十分自  
在只恁麼有何不可 過眼空花都看破紅塵外獨行  
獨坐也沒籌量也沒繫絆更覓甚三乘四果

臨江仙

和將使許過雙溪

鷓鴣一聲春事了不知苦勸誰歸花梢香露染薔薇小  
梅酸著齒酒榼正堪攜 鴨綠一篙新雨過遠山半出  
脩眉仙翁理棹欲來時繞簷烏鵲喜報與主人知

驀山溪

巢安寮畢工

鶯啼花謝斷送春歸去雨後聽鶉聲恰似訴留春不住  
韶光易邁暗被老相催無箇事沒些愁方是安身處  
栽松種菊相對爲賓主終日掩柴扉但只有清風時度  
不忻把酒又不喜觀書飢時飯飽時茶困卽勦勦睡

憶秦娥

頭如雪塵緣滾滾無休歇無休歇買田築屋是何時節  
從今事事都休說巢安寮裏藏疏拙藏疏拙許誰爲  
伴溪山風月

滿江紅

至日和黃伯威

宦海浮沈名與字不能彰徹青雲上諸公衮衮難登狹  
劣結綬彈冠成底事解頤折角皆虛說待黃梁夢覺始  
歸來非明哲 易消釋空中雪多虧缺天邊月算人生  
必有衰羸時節恁是一陽來復後梅花柳眼先春發料  
明年又老似今年當休歇

玉樓春

丙子十月生

往年糊口謀升斗朱墨塵埃粘兩袖黃梁夢斷始歸來  
依舊琴書當左右 而今藏取持螯手林下獨居閑散  
又問之何以得長年寡欲少思安老朽

又

大都四緒陰晴半天上油雲舒又卷若還心也似雲開  
老色何由來上面 生平辛苦今瀟散得喪榮枯皆歷  
遍人言不死是神仙我但耳聞非眼見

古今詞話云林外題詞垂虹傳者以爲仙壽皇閱之  
咲曰此閩人作耳蓋以老叶我爲閩音也雙溪此集  
以方音叶者十居三四其時取便歌喉所謹嚴者在  
律而不在韻故不甚以爲嫌毛稚黃嘗主是說而戈  
寶士力誡之則以防下流之佞越固兩是也納蘭侍  
衛云韻本休文小學之書以爲詩韻已誤今人又爲

詞韻謬之謬也其理甚微特難爲躁心人道耳又寶  
士著書動謂宋詞失韻余謂執韻以繩今之不知宮  
調者則可若以繩宋人似尙隔一塵也半唐老人

龍川詞補

宋 永康 陳 亮 同甫

點絳脣

聖節

電繞璇樞此時昌運生真主慶聯簪組喜氣生綿宇

宴啟霽雲湛露恩均布鏘韶濩鳳歌鸞舞玉罕飛香醕

又

碧落蟠桃春風種在瓊瑤苑幾回花綻一子千年見

香染丹霞摘向流虹日深深願萬年天算玉顆常來獻

又

煙雨樓臺曉來獨上無滋味落花流水掩映漁樵市

酒聖詩狂只遣愁無計頻凝睇問人天際曾見歸舟未  
南歌子

池草抽新碧山桃褪小紅尋春閑過小園東春在亂花  
深處鳥聲中 游鞚歸敲月春衫醉舞風誰家三弄學  
元戎吹起閑愁容易上眉峯

好事近

籬菊吐寒花香弄小園秋色攜手畫闌西畔憶去年同  
摘 小亭依舊鎖西風往事已無跡懶向碧雲深處問  
征鴻消息

又

橫玉叫清宵簾外月侵殘燭人在畫樓高處倚闌干幾  
曲穿雲裂石韻悠揚風細斷還續驚落小梅香粉點  
一庭苔綠

詠梅

的皜兩三枝點破暮煙蒼碧好在屋簷斜入傍玉奴橫  
笛月華如水過林塘花陰弄苔石欲向夢中飛蝶恐  
幽香難覓

浣溪沙

小雨翻花落畫簷蘭堂香注酒重添花枝能語出朱簾

緩步金蓮移小小持盃玉筍露纖纖此時誰不醉厭厭

采桑子

桃花已作東風笑小蕊嫣然春色暄妍緩步煙霞到洞天一盃滿瀉蒲桃綠且共留連醉倒花前也占紅香

影裏眠

朝中措

蓼花風淡水雲纖倚閣捲重簾索莫敗荷翠減蕭疏晚口紅添魂銷天末眉橫岫斜挂新蟾誰信故人千里此時卻到眉尖

柳梢青

柳絲煙織掩映小池鱗鱗波碧幾片飛花半簷殘雨長  
亭愁寂 憑高望斷江南悵千里疏煙淡日鬪草風流  
弄梅情分教人思憶

浪淘沙

霞尾卷輕綃柳外風搖斷虹低繫碧山腰古往今來離  
別地煙水迢迢 歸鴈下平橋目斷魂銷夕陽無限滿  
江皋楊柳杏花相對晚各自無聊

梅

院落曉風酸春入西園芳英吹破玉闌干牆外紅塵飛

不到微骨清寒 清淺小堤灣瘦竹團欒水光疏影有  
無閒髻髻浣沙溪上見波面雲鬟

小重山

碧幕霞綃一縷紅槐枝啼宿鳥冷煙濃小樓愁倚畫闌  
東黃昏月一笛碧雲風 往事已成空夢魂飛不到楚  
王宮翠綃和淚暗偷封江南闊無處覓征鴻  
轉調踏莎行

上巳道中作

洛浦塵生巫山夢斷旗亭煙草裏春深淺梨花落盡酴  
醿又綻天氣也似尋常庭院 向晚情懷十分惱亂水

邊佳麗地近前細看娉婷笑語流觴美滿意思不到夕  
陽孤館

品令

詠雪梅

瀟灑林塘暮正迤邐香風度一番天氣又添作瓊枝玉  
樹粉蝶無蹤疑在落花深處深沈庭院也卷起重簾  
否十分春色依約見了水村竹塢怎向江南更說杏花

煙雨

最高樓

詠梅

春乍透香早暗偷傳深院落鬪清妍紫檀枝似流蘇帶  
黃金鬚勝辟寒鈿更朝朝瓊樹好笑當年花不向沈  
香亭上看樹不著唐昌宮裏翫衣帶水隔風煙鉛華不  
御凌波處蛾眉淡掃至尊前管如今渾似了更堪憐

青玉案

武陵溪上桃花路見征騎怱怱去嘶入斜陽芳草渡讀  
書窗下彈琴石上留得銷魂處落花冉冉春將暮空  
寫池塘夢中句黃犬書來何日許輞川輕舸杜陵尊酒  
半夜燈前雨

訴衷情

獨凭江檻思悠悠斜日墮林邱鴛鴦屬玉飛處急槳蕩  
輕舟紅蓼岸白蘋洲夜來秋數聲漁父一曲水仙歌  
斷還愁

南鄉子

風雨滿蘋洲繡閣銀屏一夜秋當日鞦韆塵何處去溪樓  
怎對煙波不淚流天際日歸舟浪卷濤翻一葉浮也  
似我儂魂不定悠悠宋玉方悲庾信愁

一叢花

溪堂玩月作

冰輪斜輾鏡天長江練隱寒光危闌醉倚人如畫隔煙

村何處鳴榔舫鵲倦棲魚龍驚起星斗挂垂楊  
蘆花千頃水微茫秋色滿江鄉樓臺恍似遊仙夢又疑是洛浦瀟湘風露浩然山河影轉今古照淒涼

清平樂

秋晚伯成兄往龍興山中意其登山臨水不無閨房之思作此詞惱之

銀屏繡閣不道鮫綃薄嘶騎怱怱塵漠漠還過夕陽村落亂山千疊無情今宵遮斷愁人兩處香銷夢覺一般曉月秋聲

漁家傲

重陽日作

漠漠平沙初落雁黃花濁酒情何限紅日漸低秋漸晚  
聽客勸金荷莫訴眞珠滿 坐上少年差氣岸題詩落  
帽從來慣戲馬龍山當日燕眞奇觀尊前未覺風流遠  
醜奴兒

詠梅

黃昏山驛消魂處枝亞疏籬枝亞疏籬醞藉香風蜜打  
圍 隔離雞犬誰家舍門掩斜暉門掩斜暉花落花開  
總不知

滴滴金

音川言有  
斷橋雪霽聞啼鳥對林花弄晴曉畫角吹殘客愁醒見  
梢頭紅小 團秋翦蠟知多少向風前壓春倒江嶂人  
煙畫圖中有短篷香遶

七娘子

三衢道中作

風流家世傳張緒似靈和新種垂楊縷綺席攜詞銀臺  
奏賦當年夢遶蓬山路 賣花聲斷藍橋暮記吟鞭醉  
帽曾經處蜀郡歸來荊州老去心情零亂隨風絮

醉花陰

重九諸公招飲于茲者十有六人偶掇醉花陰腔折


聖書之壁閒聊以誌時耳

峻極雲端瀟灑寺賦我登高意好景屬清遊玉友黃花  
謾續龍山事 秋風滿座芝蘭媚杯酒隨宜醉行樂任  
天真一笑和同休問無攜妓

再用前韻

姓名未勒慈恩寺誰作山林意杯酒且同歡不許時人  
輕料吾曹事 可憐風月於人媚那對花前醉珍重主  
人情聞說當年宴出紅妝妓

龍川詞補



龜峯詞

宋 陳 人 傑

沁園春

予以爲古今詞人負抱所有妍媸長短雖已自信亦必當世名鉅爲之印可然後人信以傳昔劉父未有顯稱及以雪車冰柱二篇爲韓文公所賞一日之名遂埒張孟子嘗得父遺集觀其餘作多不稱是而流傳至今未就泯滅者以韓公所賞題品爾今才士滿世所負當不止父如然而獎借後進竟未有如韓公者才難不其然有亦未易識誦山谷之詩不覺喟然

因作思古人一曲他時儻遇知己無妨反騷

不恨窮途所恨吾生不見古人似道傍郭泰品題季偉  
舟中謝尙賞識袁宏又似元之與蘇和仲汲引孫丁晁  
李秦今安在但高風凜凜墳草青青江東無我無卿  
政自要胷中分渭涇嘆今人榮貴祇修邊幅斯文寂寞  
終欠宗盟面口長江目迷東野卻笑韓公接後生知音  
者恨黃金難鑄清淚如傾

天問

我夢登天盡把不平問之化工似桂花開日秋高露冷  
梅花開日歲老霜濃如此清標依然香性長在淒涼索

冀中何爲者祇紛紛桃李占斷春風 一時列鼎分封  
豈猿臂將軍無寸功想世間成敗不關工拙男兒濟否  
只繫遭逢天曰果然事皆偶爾鑿井得銅奴得翁君歸  
去但力行好事休問窮通

### 留春

春爲誰來誰遣之歸挽之不還縱小桃穠李大都寂寞  
紫薇紅藥未到闌珊畢竟須歸何妨小駐容我一尊煙  
雨間春無語只遊絲舞蝶懶上盃盤 故園風物班班  
柰聲利羈留身未閑望歸鴻影盡白雲萬里啼鶻聲切  
落日千山春卻笑人年來何事要得一歸如許難君知

否百八盤世路盡在長安

守歲

大歲茫茫猶有歸時我胡不歸爲桂枝關約十年闕下  
梅花夢想半夜天涯婪尾三盃膠牙一標節物依然心  
事非長安市只喧喧簫鼓催老男兒 篝燈自理征衣  
正歷亂愁腸千萬絲想椒盤寂寞空傳舊頌桃符冷落  
誰撰新詩世事乾忙人生算遂何限春風拋路歧身安  
處且開眉一笑何以家爲

問杜鵑

爲問杜鵑抵死催歸汝胡不歸似遼東白鶴尙尋華表

海中立身猶記身衣吳蜀非遙羽毛自好合趁東風飛  
向西何爲者卻身羈荒樹血灑芳枝 興亡常事休悲  
算人世榮華都幾時看錦江好在臥龍已矣玉山無恙  
躍馬何之不解自寬徒然相勸我輩行藏君豈知閩山  
路待封侯事了歸去非遲

盧仝有詩云大歲只遊桃李徑春風肯管歲寒枝予  
每三復斯言以爲嘆息偶因庭竹有感因作此詞

春事方濃寂寞此君誰相品題到僊桃憇李鳩邊雨急  
埋薇瘞藥燕外泥肥身影舒炎黃埃漲暑又過綠陰青  
子時夫然後向猷家載酒詔室題詩 風標如此清奇

嘆世俗炎涼真可悲看眼空凡木雲霄直上心交古榦  
霜雪相依彈壓溪山留連風月紅紫紛紛誰似之人間  
世這澹中風味兒輩爭知

又

詩不窮人人道得詩勝如得官有山川草木縱橫紙上  
蟲魚鳥獸飛動毫端水到渠成風來帆速廿四中書考  
不難惟詩也是乾坤清氣造物須慳 金張許史渾閑  
未必有功名久後看算南朝將相到今幾姓西湖名勝  
只說孤山象笏堆牀蟬冠滿座無此新詩傳世閒杜陵  
老向年時也自井凍衣寒

予弱冠之年隨牒江東漕閘嘗與友人暇日命酒層樓不惟鍾阜石城之勝班班在目而平淮如席亦橫陳樽俎閒旣而北歷淮山自齊安沂江汎湖薄遊巴陵又得登岳陽樓以盡荊州之偉觀孫劉虎視遺蹟依然山川草木差強人意泊回京師日詣豐樂樓以觀西湖回誦友人東南嫵媚雌了男兒之句嘆息者久之酒酣大書東壁以寫胸中之勃鬱時嘉熙庚子季秋下澣也

記上層樓與岳陽樓醜酒賦詩望長山遠水荊州形勝夕陽枯木六代興衰扶起仲謀喚回玄德笑殺景升豚

犬兒歸來也對西湖嘆息是夢耶非 諸君傅粉塗脂  
問南北戰爭都不知恨孤山霜重梅凋老葉平堤雨急  
柳泣殘絲玉壘騰煙珠淮飛浪萬里腥風吹鼓鞞原夫  
輩算事今如此安用毛錐

丁酉歲感事

誰使神州百年陸沈青瑣未還口晚星殘月北州豪傑  
西風斜日東帝江山劉表坐談深源輕進機會失之彈  
指間傷心事是年年冰合在在風寒 說和說戰多難  
算未必江沱堪宴安嘆封侯心在鱸鯨失木平戎策就  
虎豹當關渠自無謀事猶可做更剔殘燈抽劍看麒麟

閣豈中興人物不畫儒冠

吳興懷古

落日都門買得扁舟乘興而東正苕川半夜月寒似水  
蘋洲一路秋老多風攜妓溪山尋春歲月往事黃梁昨  
夢中高樓上問何人懷古湖海元龍 諸君解后相逢  
更休問奚奴金錯空向瑣窗看鏡鬢無霜白玉卮揮酒  
臉有潮紅蓴美鱸肥橙香蟹壯風味不如歸興濃明朝  
去有西門一木直與天通

同前韻再會君鼎飲因以爲別

此去長安說似交游我來自東向蒹葭極浦吟篷泊雨

梧桐孤店醉幘欹風青市生涯白洲活計都在水鄉魚  
稻中郵亭上俯清流長嘯驚起虬龍 雲山面面迎逢  
便回首舊遊雲水空有連天秋草寒煙借碧滿城霜葉  
落照爭紅六代蜂窠七賢蝶夢句引客愁如酒濃人間  
世只醉鄉堪向休問窮通

吳門懷古

草滿姑蘇問訊夫差今安在哉望虎邱蒼莽愁隨月上  
蠡湖浩渺興逐潮來自古男兒可人心事惆悵要離招  
不迴離之後似舞陽幾箇成甚人才 西風斜照徘徊  
比舊日江南尤可哀嘆茫茫馬腹黃塵如許紛紛牛背

青眼難開應物香銷樂天句杳無限風情成死灰都休  
問向客邊解后祇好拈盃

浙江觀瀾

日薄風猱萬里空江隱隱有聲旋千旗萬棹一時東指  
青山斷處白浪成層漸近漸高可驚可喜歛作雪峯樓  
外橫教人訝是鯨掀鼇扑蛟鬪龍爭 屬鏤忠恨騰騰  
要句踐城臺都蕩平柰岸身不動潮頭自落又如飛劍  
斫倒鼉城若到夜深更和月看組綬分明十萬兵尤奇  
特有稼軒一曲真野狐精

贈陳用明

把酒西湖花月三年不見家山想荆州座上消磨歲月  
唐風集裏收卷波瀾鶴邑朝帆鱸鄉夕棹來往菰蒲何  
處閒應思我似騎驢杜甫長在長安 相逢依舊開顏  
聽玉屑霏霏當暑寒笑髯生如許尙誇年少心忙未了  
浪說身閒塵夢無憑菟裘堪老付子聲名吾欲還斜陽  
外把平生心事同倚闌干

送陳起辛歸長樂

過了梅花縱有春風不如早還正燕泥日暖草綿別路  
鬢朝煙澹柳拂征鞍黎嶺天高建溪雷吼歸好不知行  
路難龜山下漸青梅初熟盧橘猶酸 名場老我閒關

分歲晚誅茅湖上山嘆龍舒君去尙留破硯魚軒人老  
長把連環鏡影霜侵衣痕塵暗贏得狂名傳世間君歸  
日見家林舊竹爲報平安

送高君紹遊雪川

斗酒津亭方送月薌夫君又行正夕陽枯木低回征路  
寒煙衰草迤邐離情京洛風塵吳興山水等是東西南  
北人思君處只梅花解后心目開明 江湖夜雨青燈  
曾說盡百年間廢興嘆屠龍事業依然汗漫歌魚歲月  
政爾崢嶸但使豫州堪容立德何必區區依景升需時  
耳算不應長是豎子成名

送鄭通父之吳門謁宋使君

寒外江山如此蕭條可堪別離縱虹橋煙浪要君懷古  
鳳城風雨奈我相思玉蘭揮詩金鯨瀉酒件件清狂分  
付誰長安市口幾多心事歲老相期 春風漸到梅枝  
算我輩榮枯應似之莫提攜劍鋏悲歌一曲摩挲髀肉  
清淚雙垂話到辛酸居然慷慨躍馬歲年心自知君行  
矣有廣平東閣堪著男兒

庚子歲自壽

未省吾生石室雲林金門玉堂但呂公來說風神清恠  
甘公來說壽祿高強果若人言自應年少曳紫鳴珂游

帝鄉何爲者更風塵牢落岐路回皇 替人縫嫁衣裳  
余未遇良媒空自傷豈平生猶欠陰功活蟻從前未卜  
吉地眠羊歲晏何如時來便做但恐鬢毛容易霜今休  
問且揆予初度滿引金觴

辛丑歲自壽

五彩雲中羣玉峯頭是吾故鄉爲瑤池侍宴偶違酒令  
玉皇降勅謫作詩狂檜柏風姿山林氣象未到中年先  
老蒼西湖路儘留連光景傲睨冰霜 東窗翦燭焚香  
牘滿引梅花進壽觴夢羣仙相慶烹炮麟鳳十洲同往  
驂騎鸞鳳約向人間儘償吟債依舊乘風來帝鄉如今

未且百年管領橘綠橙黃

贈人

如此男兒可是疎狂才大興濃口曹瞞事業雀臺夜月  
建封氣概燕子春風叱咤生雷肝腸似石纔到尊前都  
不同人閒世只嬋娟一劍磨盡英雄 半生書劍無功  
漫贏得閒情如二公向紫雲歌畔玉舳最滿紅桃笑裏  
金錯長空馳陌陌三年牛腰幾束半在蘭香巾笥中君知  
否是揚州景物消得司封

送宗人景召遊姑蘇

世路如秋萬里蕭條君何所之想鱸鄉煙水尙堪垂釣

虎邱泉石儘可題詩橙弄霜黃蘆飄雪白何處西風無  
酒旗經行地有會心之事好吐胸奇一邱封了要離  
問世上男兒今有誰但一尊相屬居然感慨扁舟獨往  
可是欽寄齊邱歌魚揚州跨鶴風味淺深君自知匆匆  
去算梅邊春動又是歸期

次韻林南金賦愁

撫劍悲歌縱有杜康可能解憂爲修名不立此身易老  
古心自許與世多尤平子詩中庾生賦裏滿目江山無  
限愁關情處是聞鷄半夜擊楫中流澹煙衰草連秋  
聽鳴鳩聲聲相應酬嘆霸才重耳泥塗在楚雄心元德

詞學言  
歲月依劉夢落萼邊神遊菊外已分他年專一邱長安  
道且身如王粲時復登樓

南金又賦無愁予曰丈夫涉世非心木石安得無愁  
時顧所愁何如爾杜子美平生困躓不偶而嘆老羞  
卑之言少愛君憂國之意多可謂之得所愁矣若於  
著衣喫飯一一未能忘情此爲不知命者故用韻以  
反騷

我自無憂何用攢眉今憂古憂嘆風寒楚蜀百年受病  
江分南北千載歸尤洛下銅駝昭陵石馬物不自愁人  
替愁興亡事向西風把劍清淚雙流 邊頭依舊防秋

問諸將君恩酌未酌悵書生浪說皇王帝霸功名已屬  
韓岳張劉不許請纓猶堪草檄誰肯種瓜歸故邱江中  
蜃識平生許事吐氣成樓

送馬正君歸東嘉

盡典春衣換酒津亭送君此行嘆清朝有道何曾逐客  
有司議法忍及書生歸去來兮噫其甚矣見說江濤也  
不平君之友豈都無義士剖膽相明 挑詩行李如冰  
正趁得越山桃李春把從前豪舉著些老氣不應造物  
到底無情鴈蕩煙霞鳳城風雨兩地相思魂夢清重來  
否算海口未窄猶可騎鯨

詠西湖酒樓

南北戰爭惟有西湖長如太平看高樓倚郭雲邊矗棟  
小亭連苑波上飛甍太守風流遊人歡暢氣象邇來都  
斬新鞦韆外賸釵駢玉燕酒列金鯨 人生樂事良辰  
况鶯燕聲中長是晴正風嘶寶馬軟紅不動煙分綵鷁  
澄碧無聲倚柳分題藉花傳盃滿眼繁華無限情誰知  
道有種梅處士貧裏看春

同林義倩遊惠覺寺衲子差可與語因作葛藤語示  
之

萬法皆空空卽是空佛安在哉有雲名妙淨可遮熱惱

海名圓覺堪洗塵埃翠竹真如黃花般若心上種來心  
上開教參熟是菩提無樹明鏡非臺 偷閑來此徘徊  
把人世黃梁都喚回算五陵豪客百年榮貴何如衲子  
一鉢生涯俯仰溪山婆娑松檜兩腋清風茶一盃拏舟  
去更掃塵東壁聊記曾來

壬寅春寓東林山中有感而作

懶學馮君彈鋏歌魚如今五年爲西湖西子費人料理  
東林陳老特地留連坐註蟲魚行吟雌霓竟負逍遙弟  
一篇過從少但赤髭白足時復談禪 倚門白水平田  
看數點青山無盡天嘆春風心事已成待兔夕陽時節

又聽啼鵲如此淒涼若爲排遣不是詩邊卽酒邊中宵  
夢有逋梅吹雪坡柳搖煙

賦月潭主人荷花障

雲錦亭西記與詩人拍浮酒船看洛川妃子錦衾照水  
漢皋遊女玉佩搖煙秋老芳心波空豔質惟見寒霜凋  
碧圓爭知道有西湖五月長在尊前 素紈紅障相鮮  
更澹靜一枝真葉仙向風軒搖動但無香耳蓼叢掩映  
自是天然猊背生煙蠟心吐月贏得吳娃歌採蓮陳公  
子似日休鍾愛興滿吟邊

鏡鏡遊吳中

易得仲宣難得世閒有劉景升嘆男兒未到鳴珂謁帝  
此身那免彈鋏依人橘自湓州猶難共器一榻相看如  
越秦元龍者獨門前口客胸次無塵君今重蒞詩盟  
載弄玉飛瓊車後行過鳴夷西子曾遊處所水雲應喜  
重見娉婷張禹堂深馬融帳煖吟罷不妨絲竹聲松江  
上約扁舟棹雪同看梅春

淳祐壬寅黃鐘之月連日風雨陳月潭以上澣三日  
舉神霄將吏之祀登壇焚篆忽雲開晴作沁園春歌  
之

道骨仙風自天上來月潭主人把玉清寶印按行川嶽

神霄鐵尺鞭叱雷霆雨部收晴日君騰照一寸靈章飛  
杳冥旛旗外覺陰風肅肅奔走神兵 登壇瀝酒刑牲  
有法饌如山飽萬靈想茆龍驚起碧潭無底妖蟆戮盡  
珪月長明行比旌陽功高李靖玉府丹臺登姓名平生  
志合爲霖爲雨大憫蒼生

姑蘇新邑有善爲計然之術者家用以肥旣而作堂  
佚老扁曰閑貴蓋取唐人白衣閑亦貴何必謁天階  
之句友人池襲父邀予同賦因作長短句遺之

禁鼓蓬蓬忙殺公侯穴城影中正花前豪士宿醒未解  
松間逋客清夢才濃龍尾危機犀圍長物何必飛書交

于公人閒世只閑之一字受用無窮 主人窗戶玲瓏  
悟富貴榮華回首空向竹梧側畔聚先秦錄蘭蓀裏許  
吟晚唐風琴外鴻歸碁邊鷺靜天把一邱榮此翁孫劉  
輩在百年爭戰一昧雌雄

長吉惇夫俱不盡其才而死世人工訶醜好卒然而  
定自古勳業之士皆然重可哀也已剛父兄悼其舊  
作已軼蓋嘗所嘖嘖者惜不及見之甲辰惇五所齊  
陳容公儲父

龜峯詞有所齊諸兄爲之跋安用復著贅語謾書癸  
卯冬所作懷舊一絕繫於後陳合惟善

西晉風流自一家憶君魂夢到梅花  
梅花深處無人蹟明月一枝霜外斜

龜峯詞

梅屋詩餘

宋 海鹽 許 棐 忱夫

謁金門

微雨後染得杏腮紅透春色好時人卻瘦鏡寒妝不就  
柳外一鶯啼晝約畧情懷中酒困起半彎眉印袖髻  
鬆釵玉溜

鷓鴣天

翠鳳金鸞繡欲成沈香亭下款新晴綠隨楊柳陰邊去  
紅踏桃花片上行 鶯意緒蝶心情一時分付小銀箏  
歸來玉別作醉花柔困月濾窗紗約半更

柳枝

冷迫春宵一半牀  
嬾薰香不如屏裏畫  
鴛鴦永成雙  
重疊衾羅猶未暖  
紅燭短明朝春雨足  
池塘落花忙

小重山

正是拈芳采豔時  
連朝風雨裏  
掩朱扉  
強排春恨  
翦新詞  
詞未就  
鶯唱縷金衣  
雲薄弄晴暉  
試穿花徑去  
揀

雙枝紫香紅膩著  
羅衣

別作鬢邊宜

簪不盡  
瓶裏頓將歸

滿宮春

嬾搏香慵弄粉  
猶帶淺

別作清

醒微困  
金鞍何處掠  
新歡

偷倩燕尋鶯問

柳供愁  
花獻恨  
袞袞獵紅成陣  
碧樓

能有幾番春又是一番春盡

浣溪沙

欲把香繒煖纈裁玉箱金鎖又慵開一杯茶罷上春臺  
方向柳邊揉碧縷又從花畔並紅腮不知凝待阿誰  
來

更漏子

淚淹紅腮褪粉等得玉銷花損羞阮鳳怯箏鸞指寒無  
好彈一庭雪半窗月又是獨眠時節孤枕怨小屏愁  
天涯夢裏遊

荷葉杯

鵲踏畫檐雙噪書到和笑拆封看歸程能隔幾重山遠  
約數宵別作閒峯準備繡輪雕轡遊戲說與百花知莫  
教枝上一紅飛留伴玉東西

夜行船

一轡東風留不住離歌斷日斜春暮多事啼鶯妒情飛  
燕一路送人歸去文君自被琴心誤卻惆悵落花飛  
絮錦字機寒玉爐煙冷門外亂山無數

應天長

濺紫飄紅風又雨一刻韶芳留不住燕吞聲鶯諍語待  
得晴來人已去怯新歌憐舊舞冷落豔腔芳譜要識

此時情緒豆梅酸更苦

喜遷鶯

鳩雨細燕風斜春悄謝娘家一重簾外卽天涯何必暮  
雲遮 釧金寒釵玉冷薄醉欲成還醒一春梳洗不簪

花孤負幾韶

別作華年

虞美人

杏花窗底人中酒花與

別作事

人相守簾衣不肯護春寒

一聲嬌嚏兩眉攢擁衾眠 明朝又有秋千約恐未忺

梳掠倩誰傳語畫樓風略吹絲雨溼春紅絆遊蹤

清平樂

鳳雙鸞偶天上人閒有檐玉無聲花影瘦夜淺春濃時  
候 別來幾度寒宵六橋風月迢迢燈下有誰相伴一  
方紅溼鮫綃

山花子

接柳揉花旋染衣絲絲紅翠撲春輝別作羅綺叢中無

此豔小西施 腰細最便圍舞帕袖寒時復罩香匝誤

點一痕殘粉淚怕人知

琴調相思引

粗繡盈箱錦滿機倩誰別作縫作護花衣恐花飛去無

復上芳枝 已恨遠山迷望眼不須更畫遠山眉正無

聊賴雨外一鳩啼

畫堂春

一綃香暖看燈衣  
領珠襟翠爭輝  
金毬斜鞞雪梅枝  
著帶都宜  
桃豔妝成醉臉  
柳嬌移上歌眉  
一輪蟾玉墮  
花西攜手同歸

相見歡

繡圍春水錦籠山  
冶遊天  
可惜連朝中酒怯  
秋千  
妝樓暖  
朱簾捲  
燕斜穿  
衝落兩三花片  
鏡臺邊

後庭花

一春不識西湖面  
翠羞紅倦  
雨窗和淚搖湘管  
意長牋

短 知心唯有雕梁燕  
自來相伴東風不管琵琶怨  
落花吹遍

梅屋詩餘

秋崖詞

宋 祁門 方 岳 巨山

滿江紅

乙巳生日

說與梅花且莫道今年無雪君不見秋崖鬢底莖莖騷  
屑筆硯只催人老大湖山不了詩愁絕問答管何事下  
磯來拋雲月 重省起西山笏終負卻東山屐把草堂  
借與鷺眠鷗歇烏帽久閑蒼蘚石青衫今作枯荷葉笑  
人間萬事竟何如從吾拙

九日冶城樓

且問黃花陶令後幾番重九應解笑秋崖人老不堪詩  
酒宇宙一舟吾倦矣山河兩戒天知否倚西風無柰劒  
花寒虬龍吼江欲酌談天口秋何負持螯手儘石麟  
蕪沒斷煙衰柳故國山圍青玉案何人印佩黃金斗倘  
只消江左管夷吾終須有

和程學諭

蒼石橫筇松風外自調龜息渾不記東皋秋事西湖春  
色底處未嫌吾輩在此心說與何人得向海棠爛醉過  
清明酌佳節君莫道江鱸憶吾自愛山泉漱儘月明  
夜半杜鵑聲急人事略如春夢過年光不啻驚絃發怕

醒來失口問諸公今何日

水調歌頭

九日醉中

左手紫螯蟹右手綠螺杯古今多少遺恨俛仰已塵埃  
不共青山一笑不與黃花一醉懷抱向誰開舉酒屬吾  
子此興正崔嵬夜何其秋老矣盍歸來試問先生歸  
否茅屋欲生苔窮則簞瓢陋巷造則鼎彝清廟吾意兩  
悠哉寄語雪溪外鷗鷺莫驚猜

平山堂用東坡韻

秋雨一何碧山色倚晴空江南江北愁思分付酒螺紅

蘆葉蓬舟千里菰菜蓴羹一夢無語寄歸鴻醉眼渺河  
洛遺恨夕陽中 蘋洲外山欲暝斂眉峯人閒俯仰陳  
迹歎息兩僊翁不見當時楊柳只是從前煙雨磨滅幾  
英雄天地一孤嘯匹馬又西風

九日多景樓用吳侍郎韻

醉我一壺玉了此十分秋江濤還此當日擊楫渡中流  
問訊重陽煙雨俯仰人閒今古此意渺滄洲天地幾今  
夕舉白與君浮 舊黃花新白髮笑重遊滿船明月猶  
在何日大刀頭誰跨揚州鶴去已怨故山猿老借箸欲  
前籌莫倚闌干北天際是神州

壽正提刑

巖社有明月夜半吐光寒淮南草木飛動秀出斗牛間  
自有秦沙以後試問少游而下誰捲入毫端補袞仲山  
甫冰雪照雲寰 霄漢近繡衣去錦衣還江南且爲梅  
醉莫道歲將闌三百六旬欲換五百歲終纔始日月兩  
循環酌彼金錯落澆此碧琅玕

壽吳尙書

明日又重午撓借玉蒲香勸君且盡杯酒聽我試平章  
時事艱難甚矣人物眇然如此騷意滿瀟湘醉問屈原  
子煙水正微茫 遡層巒浮疊嶂碧雲鄉眼中猶有公

在吾意亦差強胷次甲兵百萬筆底天人三策堪補舜  
衣裳要及黑頭耳霖雨趁梅黃

### 壽趙文昌

剡曲一篷月乘興到人間蓬萊山在何處鶴骨不禁寒  
胷有雲門禹穴筆有禊亭晉帖風露洗脾肝秋入紫宸  
殿磨玉寫琅玕 問何如趁瑣闥繫狨鞍江濤今已如  
此可柰寸心丹我宋與天無極公壽如春難老王氣自  
龍蟠勳業付浯石留與世人看

### 別廬山題龍湖閣

宇宙一杯酒暝色倚重湖青山杳杳何處煙水凝愁子

別岸風濤噴薄半夜魚龍悲歎能撼我詩無李白醉不  
醒喚起問何如是耶非天莽蒼雪模糊蒼顏白髮如  
此空復笑今吾寄語鸞朋鷗侶好在風殢水宿底處不  
煙蕪吾亦從此逝從我者誰歟

沁園春

賦子規

儘爲春愁儘勸春歸直恁恨深況雨急黃昏寒欺客路  
月明夜半人夢家林店舍無煙楚鄉寒食一片花飛那  
可禁小疑竚黯紅蕩翠老江樹陰陰汀洲杜若誰尋  
想朝鶴怨兮猿夜吟甚連天芳草淒迷離恨拂簾香絮

撩亂深心汝亦知乎吾今倦矣甕有餘春可共斟歸來也問淵明而後誰是知音

隳栝蘭亭序 汪彊仲大卿禊飲水西令妓歌蘭亭皆不能乃爲以平仄度此曲俾歌之

歲在永和癸丑暮春修禊蘭亭有崇山峻嶺茂林脩竹清流湍激映帶山陰曲水流觴羣賢畢至是日風和天氣清亦足以供一觴一詠暢敘幽情 悲夫一世之人或放浪形骸遇所欣雖快然自足終期於盡老之將至後視猶今隨事情遷所之既倦俛仰之間迹已陳興懷也將後之覽者有感斯文

用梁權郡韻餞春

鶯帶春來鵲喚春歸春總不知恨楊花多事杏花無賴  
半隨殘夢半惹晴絲立盡碧雲寒江欲暮怕過清明燕  
子時春且住待新筍熟了卻問行期 問春春竟何之  
看紫態紅情難語離想芳韶猶剩牡丹知處也須些个  
付與茶蘼喚取娉婷勸教春醉不道五更花漏遲愁一  
餉笑車輪生角早已天涯

壽趙尙書

蠢彼黽黽嗟爾何爲敢瞰長淮遣詩書元帥又勞指畫  
神僊壽日不放襟懷略已三年可曾一笑天豈慳吾老

子哉諸人者且攜將雅頌留待磨崖 我姑酌彼金罍  
便小醉甯辭鸚鵡盃問今何時也子其休矣有如此酒  
奚取吾儕帝曰不然政須卿輩作我長城惟汝諸凝望  
處見紅塵飛騎捷羽東來

和宋知縣致苔梅

有美人兮鐵石心腸寄春一枝喜蘚生龍甲那因雪瘵  
月橫鶴膝不受寒欺雲臥空山夢回孤驛生怕渠嗔未  
敢詩江頭路問銷魂幾許索笑何時 賦成字字明璣  
君莫倚家風舊解題歎水曹安在飄然欲去逋僊已矣  
其與誰歸煙雨愁予江山老我畢竟歲寒然後知微酸

在儘危譙斜倚殘角孤吹

和趙司戶紅藥

把酒問花爾栗梢頭春今幾何笑身居近侍階翻萬玉  
面勻菩薩髻擁千螺一一牙籤英英碧字占定花閒甲  
乙科歸來也傍紫薇吟處揉作陽和 祇今花事無多  
看幾許風煙付與他付圍將翡翠怕蜂粘粉織成雲錦  
遣鳳銜梭誰翦并刀贈之燕玉莫負雙娥嬌溜波花應  
道儘花強人面底用能歌

和林教授

子盍觀夫商工之木有樗不才縱斧斤睥睨何妨雪立

風煙傲兀怎問春回老子似之倦遊久矣歸噓漁簑羹  
芋魁村鉏外聞韭今有子芥已生臺 天於我輩悠哉  
縱作賦問天天亦猜且醉無何有酒徒陶陸與二三子  
詩友陳雷正爾眠雲阿誰敲月不是我曹不肯來君且  
住怕口生荆棘曾有塵埃

望江南

乙未生日 時赴官淮東以是日次南徐泊舟普照  
寺下侍親具湯餅寺中門有扁曰壽正山親意欣然  
蓋以正山爲岳字云

梅欲老掄月過南徐家口縱多難減鶴路程不遠易攜

書只是廢春鋤 霜滿袖茶竈借借廬湖海甚豪今倦  
矣正山雖壽竟何如一 笑薦冰蔬

蝶戀花

用韻秋懷

鴈落寒沙秋惻惻 明月蘆花共是江南客 騎鶴樓高邊  
羽急柔情不盡淮山碧 世路只催雙鬢白 菰菜蓴羹  
正自令人憶 歸夢不知江水隔 煙帆飛過平如席

又

山抹脩眉橫綠淨 浦溆生寒立 盡梧桐影香地未消簾  
幕靜 醉紅如洗風吹醒 一夜秋聲連玉井 夢落孤篷

已盡山陰興  
戊角淒涼清  
漏永江南煙  
雨何堪省

又

秋水涵空如鏡淨  
滿鏡清寒倒碧搖  
山影葑戶誰擘圓  
玉靜碧紗人怯黃昏醒  
叢桂小山寒井井  
喚起江南一葉尊  
鱸興先自新愁愁  
夜永不堪宋口重提省

木蘭花慢

吳尙書宴客漣滄觀卽席用韻

慨晴江渺渺乘風下  
倚滄浪問許大乾坤  
金焦兩點曾幾興亡  
平章古人安在但  
青山煙水共微茫  
不道鷺嘲鷗笑歸來  
鬢已蒼蒼垂楊舞盡  
斜陽雙燕語儘渠忙

黯柔情不管花深傳漏羽急飛觴思量人間如夢放半  
分伴醉半伴狂明日海棠猶舊春風未老秋娘  
如夢令

春思

知是誰家燕子直恁惺鬆言語深入繡簾來無奈落花  
飛絮春去春去且道干卿何事

海棠

雨洗海棠如雪又是清明時節燕子幾時來只了爲花  
愁絕愁絕愁絕枉與春風分說

以上卷一

寶新涼

別吳侍郎 吳時閒居數夕前夢枯梅成林一枝獨  
秀

霜月寒如洗問梅花經年何事尙迷煙水夢著翠霞尋  
好句新雪闌干獨倚見竹外一枝橫藥已占百花頭上  
了料詩情不但江山耳春已逗有佳思 一香吹動人  
閒世柰何地叢篁低碧巧相虧蔽儘讓春風凡草木便  
做雲根石底但留取微酸滋味除卻林逋無人識算歲  
寒只是天知己休弄玉怨遲暮

戊戌生日用鄭省倉韻

問訊江南客怕秋崖苔荒詩屋雲侵山屐留得釣竿西

日手夢落鷗傍鷺側倩傳語溪翁將息四十飛騰斜暮  
景笑雙篷一懶無他畫惟飽飯散輕策世閒萬事知  
何極問乾坤待誰整頓豈無豪傑水驛山村還要我料  
理松風竹雪也不學草顛詩白自有春簑黃犢在儘諸  
公寶馬搖金勒容我輩醉雲液

寄兩吳尙書

雁向愁邊落渺汀洲孤雲細雨暮天寒角有美人兮山  
翠外誰共霜橋月壑想朋友春猿秋鶴竹屋一燈碁未  
了問人間局面如何著風雨夜更商略六州鐵鑄從  
頭錯笑歸來冰鱸堪鱸雪螯堪嚼莫道孤舟橫浦激也

怕浪狂風惡且容把釣綸收卻雲外空山知何似料清  
寒只與梅花約逋老句底須作

戊申生日

一笑君知否笑當年山陰道士行歌樵叟五十到頭公  
老矣只可驚朋鷗友便富貴何如杯酒好在歸來蒼崖  
底想月明不負攜鋤手誰共酌翦霜韭 乾坤許大山  
河舊幾多人劒倚西風筆驚南斗俛仰之間成陳迹亡  
是子虛烏有渺煙草不堪回首隔塢築亭開野逕儘一  
筇兩屨山前後春且爲催花柳

己酉生日用戊申韻時自康廬歸猶在道也

天意然乎否待相攜風煙五畝招邀迂叟屋上青山花  
木野儘可兩朋三友笑老子只堪基酒似恁疏頑何爲  
者向人前不解高父手甯學圃種菘韭 春猿秋鶴皆  
依舊怪吾今鬢已成絲膽還如斗誰與廬山麾之去爾  
輩何留之有黯離緒暮江搔首非我督郵猶束帶這一  
歸更落淵明後君試問長亭柳

西江月

以兩鶴壽老人

茅屋何堪翠袖芝田自有霓裳一雙雪舞碧雲鄉富貴  
人家以上 竹外山童敲臼梅邊溪友傳觴青霞道服

石鑪香便是壽星模樣

和鄭省倉韻因以爲壽

燕子催將初度梨花指定清明春風可是太多情樂事  
良辰一併絳老從頭甲子楚騷幾度庚寅晴光不隔  
鳳凰城花底舉頭天近

又

蔬甲初肥雨潤茶鎗小摘春明野籬是處可詩情打過  
下湖船併捷報秋來旁午賢關早晚同寅綠楊連騎  
帶春城不問南山遠近

一落索

九日

瘦得黃花能小一簾香  
杳東籬雲冷正愁予  
猶幸是西風少  
葉下亭皋渺渺秋何爲者  
無錢持蟹對黃花又  
孤負重陽也

漢宮春

壽王尉

雲澗之癯有詩盟未了鷗泛江湖一官直爲仙耳不受  
塵驅高情逸韻自蘭亭已後都無準擬畫剡舟夜雪與  
君相對成圖半竹苔寒如此問誰歟來者鶴伴熏爐  
何如貯之天上風露冰壺江南春早想梅花不肯欺吾

疑便是孤山之北水香月影林逋

探梅用瀟灑江梅韻

問訊何郎怎春風未到卻月橫枝當年東閣詩興夫豈  
吾欺雲寒歲晚便相逢已負深期煩說與秋崖歸也留  
香更待何時 家住江南煙雨想疏花開遍野竹巴籬  
遙憐水邊石上煞欠渠詩月壺雪甕肯相從舍我其誰  
應自笑生來孤峭此心卻有天知

酌江月

夢雪

問天何事雪垂垂欲下又還晴卻春到梅梢香逗也儘

有心情行樂刻曲舟回瀾橋詩在一笑人如昨此情分  
付暮天寒月殘角 誰道飛夢江南羣山如畫一一瓊  
瑤琢中有玉田三萬頃云是幼輿工壑招我歸來和春  
醉去休跨揚州鶴萬花曾約酒醒當有新作

八月十四小集鄭子重帥參先月樓是夕無月和朱  
希真插天翠柳詞韻

綠尊翠勺約秋風一醉小樓先月誰取寶奩奔帝所深  
瑣玉華宮闕老桂香寒疏桐雲重生怕金蛇掣那知天  
柱一峯別與天接 我欲飛珮重遊寘之衣袖照我襟  
懷雪玉斧難藏修月手待做明宵清絕天地無塵山河

有影了不遺毫髮舉杯相屬喚誰牋與天說

### 壽老父

幅巾雲麓笑人生甕等何時是足莫道年來無好處第  
一秫田新熟孫息乘鸞大兒薦鶚翁已恩袍綠笑譚戎  
幕儘教岳也碌碌是則江南江北月明飛夢認得溪  
橋屋多少睡鄉閑日月不老柯山碁局唱箇曲兒喫些  
酒子檢點茅簷竹問梅開未一枝初破寒玉

### 戊戌壽老父

且拌春醉問人閒誰是十分如意道不好來人又道也  
有一分好處管甚長貧只消長健切莫眉頭聚儘教江

路梅花依舊留住 兒輩雖不如人有何不可怎敢嫌  
遲暮但喜吾翁躔度轉喚起煙霞深痼否極而亨剝餘  
而復長至迎初度龜圖羲畫直從今日重數是年六十  
四屬有未  
疾而生日適冬至也

萬花園用朱行父韻呈制帥趙端明

花風初逗喜邊亭依舊春閑營柳煙草隋宮歌舞地誰  
遣萬紅圍繡結酒因緣裝春富貴也要經綸手笙簫聲  
裏一江晴綠吹纒 是處羽箭如飛那知鶴府花壓闌  
干畫油幙文書談笑了餘事儘堪茶酒報答東風流連  
西日綠外沈吟久與春無負醉歸香滿襟袖

和君用

槎牙詩骨想生來無分史闡經幄呵護九關多虎豹誰  
道去天一握奏賦兩都聞韶三月鴈遠書難托一寒如  
許蟾枝莫倚高擢空使滿壑風煙半村雪月孤負梅  
花約渺渺愁予初度也山沍同雲垂幕鶴帳何如牛衣  
無恙麥隴占優渥不如歸去簷花深夜春酌

送吳丞入幕

祈山底處爲二松千竹肯題崖壁雪灑談犀麾鴈鷺爾  
輩何煩涉筆使者知乎民其勞止且莫閑耕織片言金  
石喚回春意無極雖則王謝人家一癯仙澤面作蒼

煙色茶竈筆牀將雨屐吟到梅花消息賤子何爲老仙  
如問莫道頭今白寒褰幾夢研朱看點周易

水龍吟

和朱行甫帥機瑞香

當年睡裏聞香阿誰喚做花閒瑞巾飄沈水籠熏古錦  
擁青綾被初日酣晴柔風逗暖十分情致掩窗綃待得  
香融酒醒儘消受這春思從把萬紅排比想較伊更  
爭些子詩仙老手春風妙筆要題教似十里揚州三生  
杜牧可曾知此趁紫脣微綻芳心半透與騷人醉

和朱行父海棠

畫長庭院深深春柔一枕流霞醉矇鬆欲醒嬌羞還困  
錦屏圍翠豆蔻初肥櫻桃微綻玉闌同倚記華清浴起  
涓流波暖紅漲膩棄脂水燕子來時天氣儘韶風與  
詩爲地芳叢雨歇露痕日醞英英仙意莫恨無香最憐  
有韻天然情致待問春能幾五更猶是拌今宵睡

滿庭芳

擘蟹醉題

半殼含黃雙螯擘紫風流渾是蘆花江頭秋老誰了酒  
生涯玉質金相如許怎消受明月寒沙橙香也不閑左  
手除是付詩家草泥行郭索橫戈曾怒張翰浮誇笑

鱸魚雖好風味爭些醉嚼霜前鬆雪江湖夢不枉歸槎  
停盃問余其負腹是腹負余耶

喜遷鶯

和余義夫行邊聞捷

淮山秋曉問西風幾度鴈雲蛩草鐵色驄騎金花袍窄  
未覺塞垣寒早笳鼓聲中晴色一羽不飛邊報君莫道  
怎乾坤許大英雄能少談笑鳴鏑處生縛胡雛烽火  
傳音耗漠漠寒沙荒荒殘照正恐不勞深討但喜歡迎  
馬首猶是中原遺老關何事待歸來細話一尊傾倒  
浣溪沙

和楚客言  
趙閣學餉蝓蚌酒春螺

半殼含潮帶麝香雙螯嚼雪迸臍黃蘆花洲渚夜來霜  
短棹秋江清到底長頭春甕醉爲鄉風流不枉與詩

嘗

壽潘宰

夜醉淵明把菊圖宿醒扶曉又冰壺秋香留得伴雙鳧  
併日滿浮金鑿落明年初賜玉茱萸更書欲上有除

書

以上卷二

齊天樂

和楚客賦蘆

孤篷夜傍低叢宿蕭蕭雨聲悲切一岸霜痕半江煙色  
愁到沙頭枯葉澹雲沒滅黯西風吹老滿汀新雪天豈  
無情離騷點點送歸客歸去來兮怎得儘鸞翹鷗倚  
乍寒時節秋晚山川夕陽浦漱贏得別腸干結濤翻浪  
疊那得似西來一筇橫絕搔首江南鴈銜千里月

花心動

和楚客憶梅

雪帶邊寒渺愁予雪中誰抱奇節遜在揚州逋老孤山  
芳信頓成消歇江南茅屋今安在疏影瘦秣堪歎息歸  
來未沙頭立盡暮天雲碧自笑梁園賦客倚舊日鞍

鵲春風巾幘問訊橫枝暖熱新花無處訪尋詩閣幾年  
不見冰霜面知誰共批風支月歸來也鷗盟不妨再結  
風流子

和楚客維揚燈夕

小樓簾不捲花正鬧燈火競春宵想舊日何郎飛金叵  
羅三生杜牧醉董嬌饒香塵路雲鬆鸞髻鬢月襯馬蹏  
驕彷彿神仙劉安雞犬分明富貴子晉笙簫 人生行  
樂耳君不見迷樓春綠迢迢二十四經行處舊月今橋  
但索笑梅花酒消新雪縱情詩草筆捲春潮俯仰人間  
陳迹莫惜金貂

瑞鶴仙

壽工提刑 歲十二月二十有九日實維繡衣使者  
煥章公紱麟盛旦也岳敢拜手而言曰月窮于紀  
星回于天蓋三百有六旬有六日於是焉極而歲  
功成矣惟天之運循環無窮一氣推移不可限量  
其殆極而無極歟分歲而頌椒守歲而爆竹人知  
其爲歲之極耳洪鈞轉而萬象春瑤厓新而三陽  
泰不知自吾極而始也始而又極極而又始元功  
甯有窮已哉天之生申於此時意或然也岳旣不  
能測識而又舊爲場屋士不能歌詞輒以時文體

和昌言  
按譜而腔之以致其意

一年寒盡也問秦沙梅放未也幽尋者誰也有何郎佳  
約歲云除也南枝暖也正同雲商量雪也喜東皇一轉  
洪鈞依舊春風中也香也騷情釀就書味熏成這些  
情也玉堂深也莫道年華歸也是循環三百六旬六日  
生意無窮已也但丁甯留取微酸調商鼎也

壽宋倅 七月二十三日

中元纔過節正宇宙澄清一天寒碧涼颿動秋色算佳  
辰恰是下弦當日天生俊傑富文不瑰奇挺特看葱葱  
和氣薰成共慶武夷仙伯 難得鈞鼇連六虎榜登名

新題淡墨從容蓮幕遊花縣無邀隔縱風流別駕難淹  
紫詔行對天顏咫尺更堪誇萱草長春紅衣交列

哨遍

問月

月亦老乎勸爾一杯聽說平生事吾問汝開闢自何時  
有乾坤便應有爾年幾許鴻荒邈哉遐已吾今斷自唐  
虞起繫帝曰放勳甲辰踐祚數至今宋嘉熙凡三千五  
百廿年餘嗟雨愆風偃幾盈虧老兔奔馳癡蟆吞吐定  
應衰矣噫月豈無悲吾觀人壽幾期頤炯炯雙眸子  
明清無過嬰兒但纔到中年昏然欲眊那堪老矣知何

似試以此推之吾言有理不能不自疑耳恐古時月與  
今時異恨則恨今人不千歲但見今冰輪如洗阿誰曾  
自前古看到隋唐世幾時明潔幾時昏暗畢竟少晴多  
雨須臾月落夜何其曰先生寘之姑醉

用韻作月對和程申父國錄

月曰不然君亦怎知天上從前事吾語汝月豈有弦時  
奈人間井觀乃爾休浪許麻家繆悠而已誰云魄死生  
明起又明死魄生循環晦朔有老兔自熙熙妄相傳月  
遡日光餘嗟萬古誰知了無虧玉斧修成銀蟾奔去此  
言荒矣噫世已堪悲聽君歌復解人頤桂魄何曾死

寒光不減些兒但與日相望對如兩鏡山河大地無疑  
似待旣望觀之冰輪漸側轉斜纜一鉤耳論本來不與  
中秋異恐天問靈均未知此又底用咸池重洗乾坤一  
點英氣甯老人閒世飛上天來摩挲月去纔信有晴無  
雨人生圓缺幾何其且徘徊與君同醉

眼兒媚

泊松洲

鴈帶新霜幾多愁和月落滄洲桂花如許菊花如許怎  
不悲秋 江山例合閑人管也白幾分頭去年曾此今  
年曾此煙雨孤舟

鵲橋仙

七夕送荷花

銀河無浪瓊樓不暑一點柔情如水肯捐蘭珮了渠愁  
儘閑卻纖纖機杼波心沁雪鷗邊分雨翦得荷花能  
楚天公煞自解風流看得我如何銷汝

辛丑生日小盡月

今朝廿九明朝初一怎欠秋崖箇生日客中情緒老天  
知道這月不消三十春盤縷翠春缸搖碧便泥做梅  
花消息雪邊試問是耶非笑今夕不知何夕

玉樓春

秋思

木犀過了詩憔悴只有黃花開又未秋風也不管人愁  
到處相尋吹短袂 露滴碧觴誰共醉腸斷向來攜手  
地夜寒牋與月明看未必月明知此意

虞美人

見梅

鷓清眠碎晴溪月幾夢寒簑雪斷橋籬落帶人家枝北  
枝南初著兩三花 曾於春底橫孤艇香似詩能冷娟  
娟立玉載歸壺渺渺愁予肯入楚騷無 以上卷三

一翦梅

客中新雪

誰翦輕瓊做物華春遶天涯水遶天涯園林曉樹恁橫  
斜道是梅花不是梅花宿鷺聯拳倚斷槎昨夜寒些  
今夜寒些孤舟篔簹釣煙沙待不思家怎不思家

燭影搖紅

立春日東高內翰

輦路融晴宮雲逗曉青旂報梅邊香沁綵鞭寒初信花  
風到笑語誰家簾幕鏤冰絲紅紛綠鬧髻橫玉燕鬢顛  
瓊幡不能知掉看見春來麴塵微漲催蘭權嬌黃拂  
略上柔條等得鶯眠覺引出千花萬草喜攬先椒盤竹

爆問誰天上瑤帖初供玉堂歸儼

最高樓

壬寅生日

溪南北本自一漁舟煙雨幾盟鷗白魚不負鷓鴣杓青  
簑不減鸕鶿裘怎無端貪射策覓封侯 既不似古人  
能識字又不似今人能識事空老去自宜休帝鄉五十  
六朝暮人閒四十四春秋問何如茅一把橘千頭

壽黃宰

七月十六日

朝元了萬鶴放班回攜月下天來初平家看青羊石  
王閣醉綠螺杯試鳴琴花蕩漾玉崔嵬 前十日鵲橋

飛寶轡後一月兔奩開玉鏡秋色淨夜徘徊申從五嶽  
三光出亥將二首六身排問何其餐沆漉讌蓬萊

和人投贈

秋崖底雲臥欲生苔無夢到公台有月鋤曉帶烏犍去  
與煙簑夜釣白魚來問誰能供酒料辦詩材 君莫笑  
閑忙棊得勢也莫笑浮湛魚得計胸次老雪崔嵬付老  
夫小小鸕鷀杓儘諸公衮衮鳳凰臺且容儂多種竹剝  
栽梅

行香子

癸卯生日

說與樵青緊閉柴門道先生檢校東屯阿戎安在未埽  
愁痕且免歌詞休載妓莫攜尊 梅自生春雪立前村  
道此杯酒也須溫無窮身外付與乾坤誰共耕山閑釣  
水飽窺園

江神子

牡丹

窗綃深隱護芳塵翠眉顰越精神幾雨幾晴做得這些  
春切莫近前輕著語題品錯怕渠喚 碧壺誰貯玉粼  
粼醉香茵晚風頻吹得酒痕如洗一番新只恨謫仙渾  
嬾卻辜負那倚闌人

發金陵

梅花吹夢過溪橋路迢迢雪初消似恁天寒詩瘦想無  
聊聽得草堂人有語能幾日是生朝 亂雲深處洗山  
瓢鬢蕭蕭酒紅潮回首六朝南北黯魂銷縱使鍾山青  
眼在終不似侶漁樵

水調歌頭

慶平交 七月十七

世不乏季子藉甚有休聲芝蘭挺秀庭砌廣廈萬間新  
胸次金天爽豁風骨玉堂清徹才器更輪困勁節九秋  
幹和氣萬家春 過中元纔兩日是生辰瓣香西上都

向此夕頌殷勤自有陰功天佑合享人間長壽不獨我  
知君從此見今日丹桂伴靈椿

瑞鷓鴣

中元過後恰三朝因甚庭闈喜氣飄李謫若非當此夕  
申生應是在今宵 滿斟綠醕歌檀口慢拍紅牙舞柳  
腰富貴榮華誰得似祝公千歲樂逍遙

酌江月

壽松山主人 七月十九日

楚天秋早過中元撚指萸飛四莢怪得千門佳氣滿恰  
值生申時節蓬矢當年椒盤今夕瑞木金爐藝主人情

重酒紅潮上雙頰 且看戲綵口口鼎分丹桂蘭玉同  
班列更喜萱庭南極老親授長生秘訣養浩頤然後昌  
青紫天報公陰德年年盛會祝延椿算千百  
滿庭芳

壽劉參議

七月二十日

秋入西郊律調夷則韓堂風露清涼洞天昨夜響動玉  
玎璫朱戶銀環放鑰長庚夢應誕星郎垂弧旦冀飛五  
莢簪履共稱觴 未施經濟手暫參雄府公論聲揚便  
好趁昌辰入輔吾皇況是中興啓運正當宁夢想循良  
從茲去萬年佐主福壽總無疆

壽通判 七月二十二日

星昂呈祥山川鍾秀果然生此真賢精神瑩徹秋水共  
長天况值西風初起中元過七日涼先庭院爽稱觴賀  
客車馬看駢闐 開筵稱壽處紅袖歌舞脆管繁絃願  
公與椿松對閱天年縱使平分風月不容暫吟醉茗川  
龍光近行看鳳詔促入秉鈞權

百字謠

壽正郎 七月二十四日

河南靈地信從生俊傑皆由天佑見說簪纓稱世襲復  
是青毡還舊學海淵源筆端鋒鏑未遜誰居右使臺暫

贊直須黃閣環召 欣遇初度良辰中元節過九日方  
稱壽好看萊衣舞處盡羨一門三秀名過河東迭居宰  
職復見韋平胄祝君遐算南山松柏長茂 以上卷四

癸巳上元前夕斟畢疏渾中有名句不墜宋人風格  
應酬率意之作亦較它家爲少寘之六十家中不在  
石林後邨下也玉梅詞人竝記

碎錦詞

宋

李

好古

八聲甘州

揚州

壯東南飛觀切雲高峻堞繚波長望

別作

蔽空樓櫓重

關警柝跨水飛梁百萬貔貅夜築形勝隱金湯坐落諸  
蕃膽扁榜安江遊子凭闌淒斷百年故國飛鳥斜陽  
恨當時肉食一擲賭封疆骨冷英雄何在望荒煙殘戍  
觸悲涼無言處西樓畫角風轉牙檣

又

古揚州壯麗壓長淮形勝絕東南問竹西歌吹蜀岡何  
許楊柳鬢鬢行樂誰家年少兩兩更三三知我江南客  
走馬來看 過卻長亭煙樹雲山點點煙浪漫漫料桐  
花飛盡夜合纒闌干倦繡閣庭書永望天涯芳草憶征  
鞍平安使吳牋謾遣欲寄愁難

江城子

從來難翦是離愁這些愁幾時休纔趁風檣千里到揚  
州見說蒼茫雲海外天杳杳水悠悠 男兒三十敝貂  
裘強追遊夢魂羞可解籌邊談笑覓封侯休傍塞垣醜  
酒去傷望眼怕層樓

又

平沙淺草接天長路茫茫幾興亡昨夜波聲洗岸骨如  
霜千古英雄成底事徒感慨謾悲涼少年有意伏中  
行馘名王埽沙場擊楫中流曾記淚霑裳欲上治安雙  
闕遠空悵望過維揚

水調歌頭

和金焦

歷歷江南樹半在水雲閒不須回首且來著眼向淮山  
過盡金山暈碧望斷焦山空翠楊柳繞江邊此意無人  
會獨自久憑闌夜吹簫朝問法記坡仙祇今何許當

時三峽倒詞源水調翻成新唱高壓風流前輩使我百  
憂寬有酒更如海容我醉時眠

酌江月

西風橫蕩漸霜餘黃落空山喬木照水依然冰雪在耿  
耿梅花幽獨抖擻征塵扶攜短策步繞滄浪曲悵然心  
事浮生翻覆陵谷 試向商樂亭前冷風臺上把酒招  
黃鵠四十男兒當富貴誰念漂零南北百畝春耕三閩  
雲臥此計何時卜功名休問賣書歸買黃犢

又

平生英氣歎年來都付山林泉石不作雲霄軒冕夢祇

擬綸竿簞笠見說湖陰飛飛鷗鷺半是君曾識梅花時  
節試來相與尋覓 休謾汨沒塵埃浮生能幾鏡裏催  
華髮趁取尊前強健在莫負花前別作朝傾碧自遣長鬚  
親題短句去約蕭閑客休教惆悵梅花飛盡寒食

賀新郎

僧如梵摘阮

人物風流遠憶當年江東跌宕知音南阮慣倚胡牀閒  
寄傲安腹難凭琴按妙製擁銀蟾光滿千古不傳誰好  
事忽茂陵金盃人閒見輕擘動思無限 長安釵鬢春  
橫亂做規模紅條帶撥媚深情淺安識高山流水趣兒

女空傳恩怨使得似支郎蕭散聽到三閭沈絕處慘悲  
風搖落寒江岸不腸斷也腸斷

清平樂

清淮北去千里揚州路過卻瓜州楊柳樹煙水重重無  
數 柁樓才轉前灣雲山萬點江南點點盡堪腸斷行  
人休望長安

又

瓜州渡口恰恰城如斗亂絮飛錢迎馬首也學玉關榆  
柳 面前直控金山極知形勝東南更願諸公著意休  
教忘了中原

浣溪沙

爲怯頰雲挾暑飛嫩涼故故著征衣江風吹雨過樓西  
未必男兒生不遇時來咳唾是珠璣功名終豈壯心  
違

菩薩蠻

東園映葉梅如豆西園撲地花鋪繡春水曉來深日華  
嬌漾金帶煙穿徑竹步入飛虹曲何處早鶯啼曲橋  
西復西

垂絲海棠零落

東風一夜都吹損晝長春殢佳人困滿地委香鈿人情

誰肯憐 詩人猶愛惜故故頻收拾雲綵縷絲絲嬌嬈  
憶舊時

又


納紅銷翠春風裏精神一撮金蓮底不是睡楊妃綠珠  
嬌小兒 一般嬌絕處半帶疏疏雨不解吐繇香卻教  
人斷腸

李好古碎錦詞未見著錄宋以來選本亦無隻字近  
陶覓香侍郎暮詞綜補遺始登數闕蓋塵埋數百年  
矣鄉貫仕履皆無可攷碩宋樓所藏二本其一題云  
鄉貢免解進士豈終于場屋者耶亦白石老仙之亞

也癸巳四月四日校畢記是日沈霽欲雨始雷半塘  
老人

鳧香詞綜補遺錄碎錦詞在卷十二其卷十五又載  
李好古字敏仲謁金門詞云花過雨又是一番紅素  
燕子歸來愁不語舊巢無覓處誰在玉關勞苦誰在  
玉樓歌舞若使胡塵吹得去東風侯萬戶按云李好  
古有碎錦詞一卷自署鄉貢免解進士今集中此詞  
不載當別是一人增錄於此俟博識者攻訂之半塘  
再記

碎錦詞



潛齋詞

宋 嚴陵 何夢桂 嚴叟

聲聲慢

壽何思院母夫人

人閒六月好是王母瑤池吹下冰雪一片清涼仙界蕊  
宮珠闕金貌水沈未冷看瑤階九開萸萸尙記得那年  
時手種蟠桃千葉 庭下阿兒癡絕爭戲舞綠袍環玦  
笑捧金卮滿砌蘭芽初茁七十古來稀有且高歌萬事  
休說天未老尙看他兒輩事業

八聲甘州

壽徐信甫母夫人七秩

對芙蓉峯曉雪初消雲口靄煙霏是阿誰壽母紫鸞笙  
裏玉液瓊枝元是雲翹仙子珥節度瑤池手種碧蓮子  
長記年時 此地神仙宮闕幾花封玉誥金帔霞衣但  
壽星堂上七十古來稀捧壽觴莫辭滿飲願年年對鶴  
髮蛾眉年年有麻姑麟脯王母立梨

送王野塘北歸 東魯王君野塘以均房招討經歷  
按涖嚴陵至且再葺矣夾谷按察籤事行部識拔于  
稠衆人中使下六邑按問贓狀閱實以聞自此聲譽  
獵獵如日起壬午秋省臺檄交至君奉命以往閱歲

而後歸歸則諸公已列剡交薦矣旂麾載道凡六七  
年閒蒙被休澤而歌頌勛德于祖帳之下駢肩累跡  
不特如老書生一人而已酌釣瀨之泉磨錦峰之石  
固不足以形容偉績濡毫染繭爲賦八聲甘州姑記  
其際遇之私依戀之情云爾試使善歌者爲我歌之  
當使送君短長亭下者皆爲君墮泪也

對千峰未曉聽西風吹角下譙樓擁貔貅千騎旌旛十  
里送客芳洲曾是燈棊月柝贊畫坐清油折盡長亭柳  
莫繫行舟憶昔相逢何處看飛鴻雪蹟休更回頭百  
年心事長逐水東流願君如游龍萬里我如雲終泊此

林正相思夢明年鴈到尙訊南州

滿庭芳

初夏

燕子芹乾龍孫籜老綠陰深鎖林塘午風庭院人試薄  
羅裳數盡落紅飛絮摘青梅煮酒初嘗重門靜一簾疏  
雨消盡水沈香把當年團扇恩情猶在未是相忘笑  
衰別作翁鬢髮早已蒼蒼說與乘鸞綵女看世閒多少  
炎涼都休忘別作更百年一夢且共醉霞觴  
踏莎行

夜月樓臺夕陽庭院都將前別作事思量遍當初識面

待尋常爭如

別作知

識後情如線

只怕梅梢參橫斗轉

催人歸去天涯遠斷腸當

別作多

在別離時未曾說著腸

先斷

摸魚兒

記年時人人何處長亭曾共尊酒酒闌歸去行人遠折

不盡長亭柳漸白首待把酒送君恰又清明後青條似

舊問江北江南離愁如我還更有人否 留不住強把

蔬盤滌韭行舟又報潮候風急岸花飛盡也一曲啼紅

滿袖春波皺青草外人閒此恨年年有留連握手歎人

世相逢百年歡笑能得幾回又

又

把人閒古今勦業一時都付盃酒青山行遍人華髮老

盡門前青柳試回首記曉雨征衫又過年時後相逢故

舊浪說南樓北亭花縱好

別作說亭北樓南看花縱好

能似少年否

還自笑應是山林厭韭忘卻兒童迎候興來謾學長

沙舞耍舞更無長袖眉休皺歡笑外風濤世上時時有

共君握手且盡日尊前相拌一醉醉後明朝又

意難忘

避暑林塘數元戎小隊一簇紅妝旌旛雲影動簾幙水

沈香金縷徹玉肌涼慢拍舞輕颺更一般輕絃細管孤

竹空桑 風姨昨夜癡狂向華峰吹落雲錦天裳波神  
藏不得散作滿池芳移綵鷁柳陰傍拚一醉淋浪向晚  
來歌闌飲散月在紗窗

喜遷鶯

留春不住又早是清明楊花飛絮杜宇聲聲黃昏庭院  
那更半簾風雨勸春且休歸去芳草天涯無路悄無語  
倚闌干立盡落紅無數 誰憖長門事記得當年曾趁  
梨園舞霓羽香消梁州聲歇昨夢轉頭今古金屋玉樓  
何在尙有花鈿塵土君不願怕傷心休上危樓高處

臨江仙

和毅齋見壽

十月江南風信早梅枝早閱先春田園賸得老來身浪  
言陶處士猶是晉朝臣 人道革爻居四九誰知數在  
邈迤明年五十志當伸低頭羞老婦且結會稽盟

滿江紅

春色三分怎禁得幾番風力

別作日

又早見亭臺綠水柳

搖金色滿眼春秋愁無著處知心惟有幽禽識望青

別作春

山目斷夕陽邊孤雲隔 琴酒我成三一湖外舫山頭  
屐且莫教春去亂紅堆積記得年時陪宴賞重門深處  
桃花碧待修書欲寄楚天遙無行客

憶秦娥

傷離別江南鴈斷音書絕音書絕兩行珠淚寸腸干結  
傷心長記中秋節今年還似前年月前月那知今  
夜月圓人缺

西江月

猶記春風庭院柳陰深鎖簾帷東君去後雨絲絲空認  
紫騮嘶處 夢斷簫臺無據十年往事休追忽然拈起  
舊來書依舊長亭雙淚

小重山

吹斷笙簫春夢寒倚樓思往事淚偷彈別時容易見時

難相看處惟有玉連環  
人在萬重山近來應不似舊  
時顏重門深院柳陰閑  
曾攜手休去倚危闌

### 沁園春

#### 壽夾谷書隱

光嶽儲精宇宙呈祥鍾英俊材想春秋夾谷前生夫子  
婆娑南贍見在如來龍角標辰蟾胎情丙好是生朝華  
宴開笙歌裏看見童拜舞春滿行臺 重重好事相催  
便對把黃封酌壽疊更願公殿上蚤紆袞繡願公堂下  
長戲衣萊昨夜瑤池親逢阿母欲寄蟠桃桃始栽三千  
歲待開花結子歲歲銜盃

滿江紅

和王偉翁上巳

睡起紗窗問春信幾番風候待去做踏青鞋履懶拈纖  
手塵別作座滿翠微低匊葉離愁推去來還又把菱花獨  
對淚闌干羞蓬首 回鸞字空懷袖金縷曲無心奏記  
碧桃花下夜參橫斗六幅羅裙香凝處痕痕都是尊前  
酒到如今腸斷怕回頭長門柳

沁園春

江淮等處行尙書省參知政事高公以至元二十七  
年庚寅春提兵繇歙之涓入長樂境平諸盜越兩旬

肅清八月朔師還山人何某謹拜手歌沁園春持獻  
以尾凱歌之後塵詞曰

袞衣繡裳彤弓盧矢山西將門白雪嶺蓬婆夷成坦道  
炎州蜚獠剗去連營吳越兒童江淮草木口見元戎識  
姓名爭知道這一隅斗大尙借麾旌 西風吹下天聲  
看萬騎貔貅入井口彼山棚魍魎雷霆震擊海瀕赤子  
天日開明事業方來乾坤無盡千古英雄不偶生從茲  
去看雲臺翼軫麟閣丹青

水龍吟

和何逢原見壽

倚窗閑嗅梅花霜風入袖寒初透吾年如此年年十月  
見梅如舊白髮青衫蒼頭玄鶴別作蒼花前尊酒問梅  
顏雀骨花與我是誰瘦絕正風雨年時候 不怕參橫月落怕  
人生芳盟難又高樓何處寒英吹落玉龍休奏前日花  
魁後來羹鼎總歸岩岫但逋仙流落詩香留與孤山同  
壽

酌江月

和江南惜春

三分春色更消得風雨幾番零落年少不來春老去空  
負省薇階藥燕子飛忙杜鵑啼殺總爲誰悲樂臨春結

綺舊家何處樓閣

一任年去年來悵歌

別作畫

闌舞斷

塵生簾幙千古雷塘

別作同首揚州

渾一夢人世到頭

別作可

俱錯百歲心期一春光景付與閑盃酌青蛇猶在莫教

雷雨飛卻

### 感舊再和前韻

問春何去亂隨風飛墮楊花籬落羅鞞香囊無覓處誰

有返魂靈

別作仙

藥細柳重門碧桃深巷回首曾行樂玉

龍吟斷夜深人在江閣

因念壁月瓊枝

別作林

對玉人

何處繡簾珠幕一半青銅塵滿匣空撫鸞刀金錯薇露

煙銷蓮膏花凝不寐還孤酌一春心事總將愁裏消卻

沁園春

和何逢原見壽

老去無心看盡青山山前暮雲問重來海燕烏衣安在  
乍歸遼鶴華表空存世路悠悠風塵渺渺白髮相催烏  
兔頻浮生事算天涯海角誰是閑人 幾番甲子庚申  
看青草年年秋又春笑武陵源上桃花未實崑崙山下  
瑤樹長新霓羽飄零蛾眉蕭颯欲覓神仙隔兩塵草堂  
在但休教山鬼夜半移文  
摸魚兒

邵清溪賦效顰謾作

把心期半生孤負玉堂元在何處朱絃彈絕無人聽空  
操離鸞烈女遇不遇休更問悠悠世事都如許人生草  
露看百歲勳名青銅鬢影無劍泪如雨 知誰語落落  
江空歲暮人閒一夢今古雷塘十里斜陽外野草寒鴉  
無數身世寓聊爾耳江山有恨誰堪付別作賦冰心更苦  
都說與梅花參橫月落一醉且歸去

洞仙歌

答何君壽詞

天涯何處望蒼江渺渺縱算解飛人不到笑雙丸烏兔  
兩鬢霜蓬聊爾耳那是人間三島 黃梁初夢覺起看

孤雲還自長歌自長嘯不記桃源何地橘渚何年生涯  
事惟有爐煙茶竈問先生誰友有白石青松共成三老  
喜遷鶯

感春

東君別後見說道花枝也成消瘦夜雨簾櫳柳邊庭院  
煩惱有誰捫就猶記舊看承處梅子枝頭如豆最苦是  
向重門人靜月明時候 知否人不見縱有音書爭似  
重攜手舊日沈腰如今潘鬢怎奈許多僝僽極目萬山  
深處腸斷不堪回首情寸寸到如今只在長亭煙柳

沁園春

壽毅齋思院五十二歲

尚書當年蓬矢桑弧初度佳期是詞林老虎文場威鳳

人中祥瑞天下英奇太守買臣

五十歲

中書坡老

五十五歲

十二年回首非人間事且開眉一笑醉倒金卮阿婆

還憶年時也曾趁鵝臚拜玉墀念青衫荷葉嫁衣尚在  
青銅菱影破鏡猶遺半席寒氈一官俛首造物還應戲  
小兒問天道看是他誰戲我我戲他誰

八聲甘州

傷春

倚闌干立盡看東風吹度柳綿飛怕杜鵑啼殺江南鴈

杳游子何之夢斷揚州芍藥落盡簇紅絲歌吹今何在  
一曲霓衣 往事不堪重省記柳邊深巷花外幽墀把  
菱花獨照脂粉總慵施悵春歸留春未住柰春歸不管  
玉顏衰傷心事都將分付榆砌苔磯

再用韻述懷

自遼東鶴去算何人插得翅能飛笑平生錯鑄儒冠誤  
識者也焉之謾道寒蠶冰底甕繭解成絲何許絲千丈  
補得龍衣 鏡裏不堪勳業縱夢中八翼不到天墀看  
墀閒富貴妻妾笑施施對青山千年不老但梅花頭白  
伴人衰嚴陵路年年潮水不上漁磯

賀新郎

和邵清溪自壽

世事渾無定問人間翻來覆去阿誰能忍海怒驚濤山  
相拍選甚魚龍不任看今古英雄銷盡坐對青山閑白  
日付長江流送千年恨天有意唯何甚待將洗耳泉  
邊枕正梅花霜寒月白斗回西柄自壽一觴花前醉醉  
鞞綵旛金勝笑兒輩汾陽中令倚遍層樓闌干曲慨乾  
坤渺渺青雲影無限事尊前興

再用韻傷春

花落風初定倚危闌衷情欲愬躊躇不忍把酒問春春

無語吹落游塵怎任待淚雨紅妝蕩盡不道燕銜春將  
去誤啼鶻喚起年年恨芳草路人愁甚 浮生一夢黃  
梁枕且不妨狂歌醉舞塵談揮柄金谷平泉俱塵土誰  
是當年豪勝但五柳依然陶令千古興亡東流水望孤  
鴻沒處殘陽影無限意傷春與

三用韻寄舊宮怨

更靜鐘初定捲珠簾人人獨立怨懷難忍欲撥金猊添  
沈水病力厭厭不任任蝶粉蜂黃消盡亭北海棠還開  
否縱金釵猶在成長恨花似我瘦應甚 淒涼無寐閑  
衾枕看夜深紫垣華蓋低搖杠

別作紅

柄重拂羅裳感金

線塵滿雙鴛花勝孤負我花期春令不怕鏡中羞華髮  
怕鏡中舞斷別作無件孤鸞影美盡處悠悠興

八聲甘州

感興

歎人生聊爾便晨風翼倦也迴飛况自騎款段欲追騏  
驥千里安之種得立芝瑤草不染滿頭絲一醉梅花下  
笑舞青衣 說甚封侯萬里待朱門畫戟大第崇墀人  
世何時口足造物任隆施怪周公如今不夢意周公政  
自怪吾衰歸來去夕陽牛隴夜月鷗磯

洞仙歌

和何逢原見壽

青衫白髮獨倚江樓小  
待欲題詩壓崔顥  
慨鳳臺今在否  
白鷺沙洲芳草外  
剩得閑身江表  
醉來疑夢裏  
夢入梅花歌徹  
青衣聽清窈  
起看飛鴻沒  
盡白鳥立駒誰能數  
曹瞞袁紹待明年  
七十問何如  
笑只是今朝浣花堂老

玉漏遲

梅

問春先開未  
江南野水得春初  
小獨殿羣芳  
卻道花前開早  
長苦冰霜壓盡  
更說甚風標清窈  
些子好孤香冷

豔有誰知道 年年吹落還開聽畫角樓頭送他昏曉  
何處玉堂滿地蒼苔不埽誰是肝腸鐵石與共說歲寒  
懷抱花未老無奈酒闌情好

驀山溪

雪

飛仙欲下水殿嚴妝早嬌澁怕春知跨白虬天門未曉  
霓裳零亂肌骨自清妍梅簷月柳橋風世上紅塵杳  
重門深閉忘卻山陰道呼酒嚼瓊花任醉來玉山傾倒  
無言相對這歲暮心期茅舍外玉堂前處處風流好

再用韻

春工未覺何處瓊英早夜半翦銀河到人閒樓臺初曉  
霏霏脈脈不是不分別作多情金帳暖玉堂深卻怪音塵  
杳天公謫下暫落紅塵道顏色自還憐怕輕狂隨風  
顛倒冰心誰訴但吹入梅花明月地白雲階相照天寒  
好

三用韻

蓬蓬窈窈睡夢驚回早誰爲散天花遍人間夜深分曉  
虛空幻出富貴照乾坤瓊萬頃玉千株莫道壺天杳  
平明三尺不揀江南道只怕不堅牢被天工小兒翻倒  
凝冰泮水世態總無憑明日事昨朝人誰醜還誰好

沁園春

壽何逢原北堂

孔蓋蜺旌月佩雲裳人閒女仙問韶光九十何如今待  
明朝最處好是明年戲舞稱觴一堂家慶眼見兒孫曾  
又立奇絕處看菱花白髮不改朱顏 當年手種紅蓮  
笑幾度桑田滄海乾想蟾口煉就紫皇靈藥口髯飛墮  
玉女雲輶青鳥重來紅霞儼在一曲雲和猶未閑羞塵  
世把蛾眉蟬鬢空爲誰妍

浣溪沙

寄劉總管

細柳連營綠蔭重暖風旗影颺蛇龍晝閑吟思入千峯  
紫綬金牌人綠髮繡鞵絲轡馬青驄會將三箭取侯  
封  
再用韻併簡二千戶

金紫山前山萬重山高雲密下蒼龍春來好雨遍三峯  
芳草郊原眠繭犢垂楊營壘繫花驄趣歸行有紫泥  
封

蝶戀花

卽景

風信花殘吹柳絮柳外池塘乳燕時飛度漠漠輕雲山

約住半村煙樹鳩呼雨 竹院深深深幾許深深處人閑  
誰識閑中趣彈徹瑤琴移玉柱蒼苔滿地花陰午

儀真劉伯山序草窗詞據草窗白石與夢窗唱和年

月謂夢窗與草窗唱和時其年當在八十上下白石

與夢窗唱和亦在七十以外今巖叟此集有和邵清

溪詞二闋按巖叟咸淳乙丑進士弟三人邵清溪之

生據蛾術詞選攷之為至大二年己酉詞選卷二和趙文敏詞自

序云生十四年而公薨文敏之歿為至正二年壬戌逆而溯之當生於是年距乙丑已四


十五年巖叟生年無攷其摸魚子題云和邵清溪自

壽清溪元作本集不載不知作於何年詞選紀年之

始爲後至元二年己卯是年清溪三十有一自壽之  
詞卽作於二十內外而巖叟又弱齡登第是時亦年  
逾大耋矣厥後清溪亦年至九十有二何詞人老壽  
之多耶書之以備詞壇佳話半唐老人校訖記

潛齋詩

中華民國玖拾捌年柒月廿捌日





國家圖書館



003871535



線

833

7456

v. 15

舊籍